

頤

綵

堂

文

集

頤祿堂文集卷八

秀水 沈叔埏 埴爲

跋

御製詠如意各體詩恭跋

代

臣謹案如意之製古人以之助指麾資談柄義取投之所向無不如意其爲物雖小而帝王經文緯武之緒若或寓之賈誼所謂頤指如意故史冊多稱尚焉

國朝

聖祖仁皇帝常置如意於法宮

寶座之側或名執友或名握君且每於獻歲發春

灑翰親題年年如意等句蓋

祈年錫極胥本於

敬

天勤民而念釋在茲應感如響用能躋一世於仁壽啓无  
疆之熾昌者此物此志也我

皇上臨御垂五十年化成久道累洽重熙伏惟

帝德之廣崇益見

天庥之滋至顧猶惟日孜孜無一念稍弛乾惕卽無一事  
不率

祖攸行嘗讀

御製集中歷年所詠如意器則有竹木銅玉之殊詩亦分  
五七古今諸體乃恭繹

詩旨而有以仰測

聖心之所注惟是雨暘時若年穀順成與夫六幕九州之  
蕩平三川四瀆之清晏常縈

宵旰愼厥永圖而於

皇祖手澤所貽追思

敦樸允迪

前光尤惓惓三致意焉

臣

情學勉聞未能博稽襲載嘗攷

楞嚴經如人於白衣繫如意珠忽有智者指示所願從心

方悟神珠非從外得夫摩尼爲如意珠此蓋設言也隋初  
大士施如意寶珠於文帝書云清淨解脫照徹十方則實  
有此珠矣此如意之所由名也瑯嬛記有貧士多陰德遇  
一道士遺以如意凡心有所欲一舉之頃隨卽如意又攷  
魏書世宗幼有大度雅性儉素初高祖欲觀諸子志尙乃  
大陳寶物任其所取帝惟取骨如意而已郡國志姚萇入  
蜀梓潼神張亞子授以一杖曰有兵革事所指如意萇得  
之戰無不克酉陽雜俎唐代宗時楚州獻定國寶一十二  
六曰如意寶珠其言雖各不同而以德致福則大畧相似  
況以帝王之德受祉神人有不捷於桴鼓者乎而又況我

萬年天子以亘古希有之

聖駕慶延洪則所爲如意又豈尋常歲朝圖裏春帖詞中  
羣然祝願云云者足以比擬萬一耶臣故備錄而敬識之  
如右

御筆仿李迪雞雛待飼圖恭跋

乾隆五十三年十月

上以御筆仿李迪雞雛待飼圖墨刻頒賞直省督撫蓋卽  
雞哺之微寓牧民之旨欲大吏等仰體

惠愛黎元之心時時以保赤爲念遇有災賑實心經理勿  
忘小民嗷嗷待哺之情庶幾視民如子克稱父母斯民之

責並

諭多爲摹刻徧及藩臬以下有司各官俾知畱心民瘼勉  
奏循良誠盛舉也臣歸養後應聘校文諸郡縣往往見之  
歎爲在宥之仁如傷之抱微

大聖人念釋在茲何以一

游藝而

宸衷若繪昔孟蜀頒令箴於諸邑有云朕念赤子盱食宵  
衣言之令長撫養惠綏又云驅雞爲理西犢爲規寬猛得  
所風俗可移宋太宗表其中爾俸爾祿四句爲戒石銘書  
賜郡國立於廳事之南至今具在因思宋儒黃勉齋先生

嘗宰臨川有云邑民猶雞雛也令其母也得食則呼而哺之烏鳶之來則張翅以聲之其愛民之切如此語載其門人玕江黃徹齋義明所作祠記中嗚呼

上之拈毫成象因物教人幾於几鑑孟樂無微不至矣而世之爲駁吏者圖雖高懸熟視無視甚至冥頑不悟貪黷成風遇偏袒而私幸借辦賑爲居奇甘心侵帑以剝民者吾不知其肺肝何似亦豈三尺之所能倖逃也哉

跋曾子子思子

宋紹興間新安汪康範諱編曾子十二篇子思子九篇無論所采羣經不加蒐擇而割裂經文強立名目今過而存



之故非郡齋直齋本也考漢志曾子十八篇子思子二十  
三篇其書久佚吳草廬先生序高安李純仁所編顏子言  
宋儒有以論語諸書合大戴記十篇爲曾子書又輯子思  
所言爲子思子書度卽此書同時吾浙昌化章峒麓先生  
樵曾輯曾子十八篇赤城戴良齊著曾子遺書而朱子書  
劉子澄所編曾子後云曾子七篇內篇一外篇雜篇各三  
吾友清江劉清之所集錄也又云世傳曾子書者乃取大  
戴禮之十篇以充之其言語氣象視論孟檀弓等篇所載  
相去遠甚子澄蓋病其然因輯此書以傳學者而於其精  
粗純駁之際尤致意焉晬於曾子問外仍采大戴禮之十

篇與馬總意林曾子二卷同可知隋唐志及通考所云二卷俱不出大戴十篇而朱子以世傳概之則雖與之鄉里相後先亦未嘗遽以爲善也

晁字處微號西園又號環谷度宗咸淳十年四月世孫夢斗表進少帝德祐元年十月贈晁通直郎有至正八年九年汪澤民俞希魯翟思忠朱文選隆慶三年四年唐潢伯汪尚寧諸序跋

### 跋子華子

家語載孔子臨河之操歎曰竇犢鳴犢舜華晉之賢大夫也趙簡子未得志之時須此二人而後從政及其已得志

也而殺之某聞之刳胎殺夭則麒麟不至其郊竭澤而漁則蛟龍不處其淵覆巢破卵則鳳凰不翔其邑何則君子違傷其類者也鳥獸之於不義尚知避之況於人乎遂還息於鄒作槃琴以哀之二人行事不見於春秋內外傳余讀虎會問一篇程子曰今主君之未得志也有竇叔子者推其後而進之有舜華者挽其不及而使之當於理有晉邱鳩者展布四體以爲紀綱之僕又曰竇叔子之爲人也強毅而有立方嚴而不判其事主也齋戒祓濯而無有回心舜華多學而強記恥其所聞不惠於古初其立論挺挺而不可以奪吾邱鳩年十有五而始以勇力聞及其壯佼

也四鄰畏之能以人投人以車投車其視太行之險猶之  
步仞之邱此三臣者舉晉國之選也主君之所與懋昭其  
庸而光賁於趙宗者也公室六分河山之間龜坼而鼎立  
范氏中行氏不庇其社而頽其宗主君之所不刊則繫此  
三臣之助今無故而戮叔子矣又斃舜華於野以罪名不  
聞於國人吾邱鳩恐焉裹糧而之於他國主君其未之思  
耶何其首尾之刺戾也如是則主君之所以遠於大競者  
也据此可考知竇犢鳴犢舜華之爲人且二人之外尙有  
吾邱鳩亦未嘗見他書也昔人以此書爲僞吾未敢盡信

山谷刀筆跋

葛春嶼上舍購得山谷刀筆二十卷與余家萬厯己卯江  
藩本相較知爲舊刻無疑乃星湖晚漁所藏本晚漁爲余  
同姓諱鵬字雲臯家定嚴太史所父事者也余幼同里閭  
及見其人性耽書多藏名版以卦名分識其櫥貯五間大  
樓下砌蘭兼木芍藥數叢其嗣孫立齋與余同硯席瞥眼  
五十年後人零落遺書莫可問矣此書今得所歸春嶼其  
善藏之

陳誠齋讀史隨筆跋

治史者人持一見聚訟紛紛欲如臯蘇斷獄稱明允端平  
不多得也予少喜讀當湖驛提生

馬維

纂畧趙解元

維 褒快

編及虞山錢侍御汝瞻

岱

兩晉南北合纂芟繁除荒能舉

其要惜其無所發抒不加論斷則於學者究無裨也壬辰

冬同里陳子耀曾出眎其高祖誠齋先生

忱

讀史隨筆六

卷蓋以續如岡學士

懿

讀史漫筆者卷中如論韓子平淮

西碑敘李愬功少畧佛骨表辭氣過激司空表聖營生壙

人多以曠達沒其忠貞歐陽子渎議未免有疵陳同甫對

策詔上希旨及前明議禮諸臣挺擊三案是非發潛闢微

別具手眼昔程子言凡讀史不徒要記事迹須要識治亂

安危興廢存亡之理又云須見聖賢所存治亂之機賢人

君子出處進退便是格物朱子亦曰讀史當觀大倫大機

會大治亂得失又云凡觀書史只有箇是與不是觀其是求其不是觀其不是求其是便見得義理又云史較經不同然亦自是草率不得須當看人物是如何治體是如何國勢是如何皆當子細明胡文敬謂看史能別其是非乃竊理之要斯編殆近之矣

明陸太常手書詩卷跋

明崑山陸凝菴奉常著有春雨堂稿李文正西涯序云刊落華靡澡雪鉛黛深造遠詣超然有獨得之妙狀云尤嗜書清勁可愛此卷爲奉常手書以贈丹徒趙夢麟祥戶部者凡數紙其偕太倉張滄洲武進陸治齋常熟李文安上

元倪文毅休寧程篁墩齋於翰林東廂焚香聯句三十韻  
又疊前一首爲一段送邵半江太守爲一段次韻答凌季  
行序班及牡丹短賦爲一段同涯翁次韻羅冰玉洗馬一  
首爲一段卷首有溧陽馬孟河司業題學士妙墨四字孟  
河從素師聖母文得法懸腕運肘落管如飛顧九華稱其  
對客揮灑一坐驚賞自謂得張長史李謫仙豪處雖弇州  
卮言曾警警其書非公論也舊爲京口魏氏植所藏

國朝康熙間倪雁園梁太史跋於維揚自時厥後不知流  
轉幾人矣乾隆甲辰冬侍御蘆涇先生出眎余攜歸諦玩  
約余弟雲泉分和焚香二詩會改歲卒卒未暇以爲考卷



中諸人奉常以天順八年癸未會元與冰玉同登彭教榜  
一甲進士文正文毅及滄洲並是科館選篁墩治齋又成  
化二年羅倫榜一甲進士而文安及送邵詩中張東海  
亦同年進士邵與趙則又同成化五年進士也嘗讀懷麓  
青谿篁墩三集則諸人之姓字悉在焉其齋居酬倡之作  
甚多而聯句未載當日集同第十有二人仿三楊二王杏  
園雅集故事作翰林同年會高司訓寫爲圖文正作賦文  
毅作記最後爲甲申十同年會圖則相距已二十七年惟  
涯翁以最少尚存篁墩集中有春坊齋夜追憶舊時在翰  
林東署與諸君子喜雪焚香聯句之作諸君子際化治盛

時朝野恬熙文章雍裕盍簪之樂萃於木天故其題有所謂會合聯句有所謂瀛洲別意玉署交情者於友朋聚散間尤拳拳致意因斯卷以彷彿其人而推論其世皆足備詞林掌故微特辭翰之美可以矜式後來宜侍御得而珍弄之也

跋姚蕙田先生夜雨圖卷

雍正三四年間歸安姚蕙田

世鈺

先生悼其兩弟炳衡豐萬

屬宣城沈樛厓寫夜雨圖橫卷所稱蓮花莊卽趙松雪別業寒鑑樓其兄弟讀書處也題句多東南耆宿而西泠諸老之詩畧備卷中舊存厲樊榭先生家余友汪季懷購得

之珍惜彌甚季懷伯仲紹承家學華鄂相輝天倫文酒之  
樂雅許我輩共之其弄是卷也亦欲使梓里名蹟不致流  
轉失所且常置之案頭正如親炙前賢儼聆謦欬耳

跋嚴司農與王夫人琴言倡和詩冊

余少讀顓亭司農贈婦詩竊以爲情之所鍾何其篤於伉  
儷若此之甚也及題祖臯圖始知司農性至孝嘗築城東  
臯園爲奉母養志之所復葺吾鄉馮具區祭酒僑杭遺構  
馮開之築室西谿則板輿娛侍以爲常蓋宜其家以悅乎親閨房  
靜好有固然者矣元孫立堂文學藏有琴言一冊並司農  
與配王夫人詩筒書尺真蹟畫眉筆撫簪花格妍字裏行

間丹鉛爛然同青禽翡翠之婉變抑香奩玉臺之美譚也  
有明遂寧黃夫人寄升菴殿撰之作何處青山不杜鵑已  
自津津人口至曰歸一聯胚胎雙井妙絕古今論者至疑  
升菴不無潤色然如積雨釀春寒一闕楊別和三詞俱不  
能勝新淦簡西巖芳記一詩云纔經賞月時又度菊花期  
歲月東流水人生遠別離只二十字而感時傷別聞者悽  
然殆絕唱也山陰祁忠惠少與商尚書女作配一時有金  
童玉女之稱此皆文人難得之嘉偶顧新都錦字望斷刀  
環卽中丞盡節後商詩亦有公自垂千古吾猶戀一生之  
句乃考司農家傳則結褵十五載旋賦悼亡兩美之合尤

難於白頭偕老往往而然讀竟輒爲三歎夫人名芳與字芬從爲餘杭王祖叔先生女著有紉餘小吟司農以儷語序其簡端

姚侍御書祿里字後跋

宋史崔偓佺傳淳化中偓佺爲直講引對便坐太宗顧謂曰李覺嘗奏朕云四皓中一先生或言姓用字加撇或云加點爾知否偓佺曰昔秦時程邈撰隸書訓如僕隸之易使也今字與古或異臣聞刀用爲角音兩點爲角音用上撇一點俱不成字觀偓佺所講則兩點之爲角無疑而未暇推及角之同祿也蘆渚先生此篇最爲該博子屬屠

純渚同年載入邑乘俾居是邦者咸知角里之爲祿里蓋自漢魏以來已確有可考云

七世祖愛溪公手蹟跋

七世祖愛溪公遺囑三猶子一紙傳自故明神宗萬曆四十二年甲寅九月距

今乾隆四十二年丁酉歷年一百六十有四更代凡七向爲公元姪孫孝廉諱福英所藏孝廉次子廷燁字履青者余從叔也是歲夏首先府君月樹老人之喪已逾小祥余兄弟奉母自斜橋東移居蓮花橋錢文端西第叔攜此紙見示遂以歸余按家牒公爲梅石公諱默孫禮部公諱詔

子禮部三子長鴻臚公諱應儒次諱應學次諱應文卽公也鴻臚三子長鄉飲公諱孝次諱思聖次諱思忠卽燭內所稱新亭見亭遂亭也吾家於隆萬間以高貲稱里閭所居熙春橋通閘帶園多近市之宅迤邐至東湖有柳溪書院中爲資敬堂有橋有池前堂曰溯洄後堂曰宛在有閣曰鄰僊有木扶疎有書連屋族人指千環聚而處園址至今可指數也鴻臚沒後遺產頗饒皆經公分授大意示以析箸之後仍須通財合作以守先業勵之以義氣申之以誓辭自田廬里役以至臧獲廝養三分相等至爲均平外有注記券疏今亦僅有存者語俱質實字或脫譌故問有

不易解者然紙墨完好波擊明潤我先人手澤所貽後人  
因是以遡高曾矩矱則孝弟之心可以油然而生矣嘗讀韓  
魏公重修五代祖塋域記云某自志於學每見祖先所爲  
文字與家世銘志則知寶而藏之有遺逸者精意搜掇未  
始少懈時編歲緝寢以大備其所誌先域所在雖距今百  
有餘年必思博訪而得之卒能不墜先業推及先塋之八  
世得以歲時奉祀少慰庸嗣之志明葉文莊記于節菴謙  
父幼孤流落不能詳其先世所知者黃鶴山有仙塋其兄  
弟名山壽海壽耳節菴旣長爲董孟聲鏞壻藏書有黃文  
獻集載湖南宣慰于九思行狀可考節菴能知其先以得



此文焉爾今我家先塋十世以下奉祀弗懈而銘志不存  
文字闕佚幸得此紙可不寶而藏之乎囑內諱璜者卽鄉  
賢半環老人爲鄉飲公子曰澄曰濟曰虎於系牒無考或  
初名後更或小字未易有不可盡悉者矣因付裝池并所  
聞於叔履青者綴書於後以示兩弟他日更詳考焉

跋自書雁湖陶氏修復洛山墓田碑記卷

右記余於己丑代吾師編修陸根堂先生作也先生時主  
吾郡駕湖書院講席余爲肄業生每課辱以余歷其曹偶  
者十常八九記成曾就正於先生盛承許可同里朱後齋  
茂才書以上石先是予祚上舍令子祉堂茂才與余有連

故以記屬余癸卯冬社堂借陳西齋明府入都復屬臨安  
童君繪爲洛山墓圖徧乞詩歌於

輦下諸公而繕記於首簡社堂過邸舍乞余再爲詩張之  
會余以館書紬纂尅暇遲久未有以應甲辰夏五余請假  
寧母南旋社堂尋亦歸里攜其家世譜自雁湖來晤錞于  
申之是年冬余旣作長歌題其冊因并書此卷俾藏於家  
余二十餘年所代鉅人名流碑板之作甚夥雖不敢稍存  
集中而稿未卽棄輒時時取出考核塗乙不能自休此卷  
有數處芟改與石刻異者乃余竄定本也康熙間梁溪陶  
希聲纂仰止錄內行義傳載菊隱一篇其事蹟與今所傳

無殊顧其論贊特具史材論曰散財勤王不得之冠纓而得之韋布所謂匹夫不可奪志歟贊曰秦帝連恥韓亡房奮千古頡頏而有菊隱卒散千金力挽傾運匪直也身子孫是訓義聲於昭乃在晚近譜未之載謹附錄以遺祉堂祉堂其實之

書後一

書東陽李氏春秋紀傳後

乾隆乙巳嘉平余客東陽韋五雲明經贈余是書凡本紀一卷世家十三卷王朝及列國大夫列傳三十七卷條例一卷世系圖一卷共五十三卷蓋康熙間邑人李鳳雛紫

翔氏所編明年春攜至京讀之有一二未愜余意者如鄭  
游吉傳失載戒宛射犬語子產脫大旱奪三大夫官邑一  
事而韓起聘鄭至六卿賦詩並昭十六年事不應倒置於  
十九年後齊晏子治阿事詳子華子而未及引以爲注又  
案書主左氏則魯諸公年次必應注明至自序云前人未  
備之缺典則殊不然考唐書藝文志載孫敏春秋列國名  
臣傳九卷宋儒林傳載眉山王子思當春秋列國名臣傳  
五十卷熙寧間錢唐沈存中括著春秋紀傳五十卷山谷  
所謂存中於左氏取之左右逢其原者也李巽巖齋序之  
曰凡欲觀某國之治亂某人之臧否其行事本末畢陳於

前不復錯見旁出可省繙閱之勤或事同而辭異者皆兩存之又因以得文章繁簡之度雖編削附離尙多不滿人意然亦可謂有其志矣獨所序世族譜繫旣與釋例不同又非史遷所記質諸世本亦不合也疑撰者別據他書今姑仍其舊以俟考求南宋乾道間山陰唐進道閩嘗以左氏春秋仿遷固史例以周爲紀列國爲傳又爲表志贊合五十一卷號左史傳行於世右見文獻通考及兩浙名賢錄而李氏未之知也嘻余辦左氏內外傳五十年矣惜不得合數書而參訂之

書自補唐會要手稿後

乾隆戊戌九月魚門太史屬余校唐會要百卷內第七卷至九卷卽竹垞跋所謂失去雜以他書者也余因鈔新舊唐書及太平御覽文苑英華冊府元龜諸書補之且以七卷之封禪分作二卷八卷之郊議九卷之雜郊議併爲一卷而十卷之親拜郊以雜錄併入繼以親迎氣后土則分方丘社稷藉田則以藉田東郊儀併入九宮壇則專抄禮儀志終以皇后親蠶四卷遂成完書至竹垞所闕之九十二三四三卷此本尚存蓋館書之進自邗上馬氏爲嶰谷涉江兄弟所藏者勝虞山錢氏本多矣昔褚少孫補史記孝武本紀外戚梁孝王三王世家丞相田仁任安公孫宏

滑稽曰者龜策列傳三代世表漢興以來將相名臣年表

班昭既補漢書異姓諸侯王已下至古今人表及列女傳

馬續一作續字季則融兄又補天文志光和初蔡邕劉洪補續律歷

志邕又與盧植韓詵撰補漢紀未成宋錢文子又補兵志

范書無志梁劉昭注司馬彪續漢書八志補之昭字宣卿於冠幘車

服尤詳前史所無見朱子全書無表宋熊方項平菴世安補之陳壽國志無

志元郝伯常經作八錄以補其闕蔡松年補南北史志吾

朝甬上萬石園斯徵君補歷代史表李杲堂文允補西漢節

義傳杭人姚之駟有後漢書補逸諸人皆以補史著稱而

余以抄撮成此於少孫輩特札吏比耳豈可同年語耶

書漫堂鈔本唐闕史後

右商邱宋尚書所鈔唐闕史校今知不足齋

御覽本中間訛字互有異同其最善者周丞相對馭一篇  
左右侍衛者屏息不敢進進作退仗下後自應作退李可  
及戲三教一篇優孟師曾見於史傳曾作曹師曹出左傳  
衛侯使誨嬖妾琴而鞭之三百者王居士神丹一篇謹戶  
應改瑾戶泗州風狂尼一篇女病風狂女應作如盧左丞  
赴陝郊詩一篇考左丞渥字子章伯仲四人名多從水見  
司空表聖盧渥神道碑及唐書宰相世系表紹字子美沿  
碑作治字明源沉表作沉全唐詩話作沉字德遠此又不可不知者也



又案陳直齋作香山年譜悉本高彥休唐闕史載公母墮井事甚詳而今本無之則鮑氏所刊亦非足本也

書魯秋塋補宋史蕭簡公遺事狀後

蕭簡諫天書不載宋史秋塋據國老談苑補之予讀夢溪續筆談有云公勁正不苟愛憎出於天性素與曹襄悼不協天聖中因議茶法曹力擠蕭簡因得罪去賴上察其情寢前命止從罰俸獨三司使李諮奪職謫洪州及蕭簡病有人密報云今日有佳事公聞之顧墻張盥之曰此必曹利用去也試往偵之果襄悼謫隨州公曰得上殿乎張曰已差人押出門矣公大驚曰諸公誤也利用何罪至此進

退大臣豈宜如此之遽利用在樞密院盡忠於朝廷但素不學問倔强不識好惡耳此外無大過也嗟惋久之遽覺氣塞亟召醫視之曰此必有大不如意事動其氣脈已絕不可復治是夕薨李諤在洪州聞之有詩曰空令抱恨歸黃壤不見崇山謫去時蓋未知公臨終之言也此一節亦見肅簡不念舊惡惡而知其美所當備書於家乘者也

書姚尚書手纂史記精要後

吾鄉姚禹門尚書纂有史記精要同時殷東臯高士題數言首簡公篆文兩識云嘉靖乙丑時爲揚州推官此書已相隨入稔至萬厯癸酉時爲湖廣督學副使陞江西叅政

舟行仍攜以自隨考公以編修充嘉靖壬戌房考忤總裁  
袁文榮謫外由六安州判官稍遷司李丙寅遷常州郡丞  
丁卯入爲南刑部員外俄轉祠部郎中隆慶三年己巳以  
叅議分守衡永郴尋遷本省副使提督學政萬厯元年癸  
酉晉江右左叅政前後十有六年雖水郵山驛未嘗暫離  
此書公於龍門可謂專勤而篤嗜者矣天順中崑山張節  
之副使提學吾浙讀漢書日必三十編而王元美李于鱗  
在刑曹時手抄史記文選舉觥誦以記否爲賞罰厯城殷  
文莊士儋有于鱗所閱史記於秦始皇本紀圈河魚大上人  
頭畜鳴八字昔賢好學如趙清獻校漢書百卷大率相同

法區方深各六寸間相去七寸一畝三千七百區丁男女種十畝至秋收區三升粟畝得百斛中農區田法方七寸深六寸間相去二尺一畝千二十七區丁男女種十畝秋收粟畝得五十一石下農區田法方九寸深六寸間相去三尺秋收畝得二十八石旱卽以水沃之據此則東漢明帝時以牛疲水旱墾田多減欲藉區種以增進頃畝曾詔郡國行之矣此書所引文選注祇載上農區田法而缺中農下農似猶未全又晉征西將軍鄧艾畱屯上邽爲區種之法元泰定二年右丞趙簡請行區田法則不特後魏兗州刺史劉仁之已也

國朝雍正二年十月十四日吾鄉李遜麓

維鈞

制府撫直隸

時亦曾奏請畧云臣稽之往昔伊尹耕莘之時有區田之法收穫倍蓰臣在保定城內賃地二畝僱人試行之其播種灌溉尚未如法而已收穀十六石若無地窮民得荒廢之地數畝俾其區種則數口之家卽能養贍或歲遇旱澇仿而行之於農功大有裨益奉

硃批區田一說向日視爲迂濶之談亦未聞有行之者觀爾所奏收穫倍蓰此法倘能通行獲益良匪淺鮮恭讀我世宗憲皇帝諭旨則凡有牧民之責者尤當考知其詳謹案區田之法始於伊尹田長十有八丈分十有五町中間

十四道其法有三等以上農中農下農爲別漢成帝時議  
郎汜勝之奏曰昔成湯時伊尹善區田教民糞種歲收粟  
畝百石勝之試爲之得四十石此見於諸子史傳班班可  
考也又案曲禮稻曰嘉蔬註蔬與疏同謂立苗疏則茂盛  
嘉美也已亥夏盛柚堂先生從厯下寄示續訂孫毅齋教  
稼書首述區田法適余於京邸讀范史因備書之

書太真外傳後

太真外傳二卷云史官樂史所著以懲禍階嘗讀瀟湘錄  
載貴妃晝寢驚覺見簾外雲氣氤氳令宮人視之一白鳳  
銜書自空而下立寢殿前宮人白妃妃遂命焚香受書披

讀其文曰勅謫仙子楊氏爾居玉闕之時常多傲慢謫塵  
寰之後轉有驕矜以聲色惑人君以寵愛庇族屬內則韓  
虢蠱政外則國忠秉權殊無知過之心顯有亂時之迹比  
當限滿合議復歸其如罪更愈深法不可貸專茲告示且  
與沉淪宜令死於人世妃極惡之鳳尋飛去書藏玉匣中  
三日後失之何此事獨遺之耶

書安祿山事蹟後

唐華陰尉姚汝能纂祿山事蹟三卷見崇文總目其顛末  
實兼安史唐人紀本朝事當得其詳祿山逆狀張曲江嘗  
先睹未萌矣設明皇蚤聽其言何致有兩京之陷哉顧當

時不獨曲江也顏魯公蕭穎士外如權皋之逸去甄濟之不汙亦卽其人但兩人未在高位耳夫明皇以英斷之姿截平內亂開元之盛與貞觀無殊而令德不終播遷詒辱其所蔽者皆其所溺也宋孫之翰有云祿山敗勅請誅有何難明之理明皇特以其議論堅正多所違忤又聽奸言讒間久有忌心因不從其言而沮之也嗚呼觀此書所載卽人主於尊賢一經可不以去讒爲先務歟

### 書金石例後

元潘文僖金石例十卷其子敏中同知嘉定州時嘗請序於柳道傳序曰言之精者爲文抑揚開闔旁通互用求之



於例例盡則止孰若求之無例之例爲有得乎明張東海  
跋云如碑志無書子婦例設有以子尚主而受封錫者子  
婦可不書乎又有有例而不可爲例者如柳子厚馬女雷  
五李卿外婦誌不足垂戒徒以長惡可爲例乎是故例雖  
有常變而其變也亦惟不戾其常而已不戾其常者義之  
當何屑屑於例耶近雅兩盧氏以是書與王止仲墓銘舉  
例泊

本朝黃梨洲金石要例合刊而首編遺柳序張跋闕焉未  
載予嘗謂三例可以津梁承學而不可以律文章巨公然  
於博雅好古者亦未嘗無少裨焉故獨有取於柳張之言

而並著之又文僖元史無傳志載其至元十九年知崑山縣以文學飾吏治所建立有古循良風

書草莽私乘後

陶南村輯草莽私乘一冊世尠流傳錢虞山得之江上李如一而桑海續錄以成余按龔聖予所作文陸二傳均爲未詳許可用王有文傳序已入此書而黃晉卿晉陸傳後敘

一篇則撫鄧中甫家填海錄等書附注於舊文之下訂譌

補闕亦當與傳相輔而行又新建陳士業宏緒病宋史信國

本傳萎茶洎廬陵劉岳申吉水胡廣更定較宋史頗覈而其萎茶復大相類因別爲之傳亦應增附於後又楊元誠

山居新話載陸樞密輓張郢州世傑詩云曾聞海上鐵斗  
膽猶見雲中金甲神張擁兵海上一夕大風雨張舟覆翌  
蚤獲屍棺斂焚化膽大如斗不能焚諸軍感慟忽雲中見  
金甲神云今天亡我關係匪輕後身出當恢復矣公此詩  
全篇不傳二語傳忠烈尤耿耿也并識之

書直齋書錄解題後

直齋解題與郡齋讀書志並爲鄱陽馬氏經籍考所採取  
全本散佚今從大典內纂出二十二卷嘗考齊東野語吳  
興備志及王張栗程舊志陳振孫字伯玉安吉人性勤敏  
博通古今藏書最多宋理宗嘉熙四年爲溧水教授累遷

浙西提舉改知嘉興府一意卹民舉行藥萬戶停廢醋庫  
邦人德之管攝興化篆折獄平允時皆服其得法外意焉  
淳祐九年以侍郎致仕家居修吳興人物志討摭舊事頗  
詳其仕於莆也傳錄夾漈鄭氏方氏林氏吳氏舊書至五  
萬一千一百八十餘卷仿晁氏志各爲解題讐勘精詳諸  
書所述如此其守禾治行郡志遺之乾隆乙未余客京師  
寓裴文達公

賜第銅梁王榕軒檢討贈余是書蓋聚珍板也錄中附有  
隨齋批注一時纂修諸公未詳其人余按卷三鄭樵石鼓  
文考批注有先文簡字宋龍圖閣學士吏部尙書新安程

秦之

大昌

諡文簡曾孫棨字竹甫號隨齋元時人周益公作

文簡墓志云公自宦遊去鄉里樂吳興溪山之勝而卜居焉晚得安吉梅溪鄉邸閣山規營塋域卒葬其地子四人準新本阜孫三人端復端節端履文簡自歛遷湖子孫贊安吉與直齋同時同里而批注所云樵以秦斤秦權有函毆兩字遂以石鼓爲秦物先文簡論而非之其說具載演繁露則隨齋之爲槩確然無疑矣又錄中論語意原不知作者余考之乃青田宋侍郎東谷鄉汝諧所撰吾鄉婁彥發叅政諡忠簡宋史本傳及樓攻媿所撰神道碑並闕焉亦見批注此則其後人亦莫之知也

書天一閣書目後

右目爲韓城師初視浙學時鄞屬所呈計書五千有零不分門類不加詮次無論秘冊絕少卽居易錄所載經解唐人集亦未及備而先牛亥豕又參錯其間蓋尋常官簿本也嘗考明嘉靖末范東明少司馬解組歸卜築兩湖深處性喜藏書得城西豐氏萬卷樓舊物於舍中起閣初名寶書因得揭文安所書天一池拓本改名天一取生水脈火之義盡購東南異本羅列籤厨尤善收說經諸書訂刊十六種如京氏易傳郭氏易舉正之類及先輩詩文集未傳世者與婁東王弼州家歲以書目取較各鈔所未見相易

故浙東儲藏家以范氏爲第一至今二百餘年卷帙完善  
吾

朝康熙間李杲堂與胡道南共輯甬上耆舊詩公會孫光

燮開閣縱觀因得鄭榮陽

真

黃南山

潤

謝廷蘭

瑾

魏雲松

傳

諸集錄入詩中俱前此選家所未見者有功於其鄉之

文獻甚大公猶子子宣鴻臚

大

澈亦酷嗜鈔書每見人有寫

本未傳必苦借之在長安邸中所養書傭多至二三十人  
接几而食旣家居築室西臯復與里中賢士大夫品第所  
得者垂二十年初公起閣時子宣數從借觀公不時應子  
宣拂然益徧搜海內異書秘本傾貲購之凡得一書知爲

閣本所無輒具酒茗佳設迓公至其家以書置几上公取閱之默然而去其嗜奇爭勝若此公從孫襄陽太守君材汝性亦嗜學積帙與司馬公埒顧鴻臚襄陽俱無書目流傳世地知之轉不若四香居陳氏南軒陸氏之著稱而閣遂擅名左浙云

范氏之守世書也余嘗求其故而不可得或曰其家奉司馬公遺訓代不分書書不出閣有借鈔者主人延入日資給之如鄴侯父承休聚書三萬餘卷戒子孫世間有求讀者別院供饌是也或曰閣編緝惟謹司馬後人分八九宅各司其管一管不至閣不能開借書者以爲難書得不散



案焦氏經籍志四明范氏書目二卷范欽撰或曰其家另有書目不以示人今所傳者特贋本耳是數說者余將倣取一焉

頤綵堂文集卷九

秀水 沈叔埏 埴爲

書後 二

書重編武安王集後

元巴郡胡光瑋

琦

編關王事迹五卷附玉泉志三卷明成

化七年辛卯解州牧張寧重鋟諸梓余家藏其書此集爲

康熙八年己酉太倉顧伊人

渭

校刊蓋取高陵呂文簡謫

判時所修次第釐定爲考八篇曰本傳曰故事曰譜系曰

墳廟曰封爵曰神蹟曰正俗曰藝文又輯附錄二卷嘗讀

明始興張羽王

鳴鳳

集馬平劉君守徐曰建祠城南戲馬臺

事序有云程氏爵謚考姜氏事蹟序可稱精嚴所當載入  
藝文者也案康熙十七年戊午常平士于昌者讀書塢廟  
晝夢侯授以易碑二大字驚寤見濬井者得巨甕碎之昌  
急合讀乃紀侯之祖考兩世諱字生卒甲子大畧循山而  
求得墓道焉遂奔告州牧王朱旦朱旦作侯祖墓碑記錢  
唐馮山公景曾竄定其文非若江辰六移建關公父母殿  
記所引金大定十七年三月里人王興重葺祖塢文並無  
祖父名諱也此當入譜系考又案我

朝

世祖章皇帝時封侯爲忠義神武大帝乾隆三十二年丁亥

特加靈佑二字用示尊崇先是二十五年庚辰二月以帝原諡實與功德未符奉

旨改爲神勇至四十一年丙申七月改諡忠義此當入封爵考而神蹟考載太倉嘉定捍倭碑記則吾郡市心廟嵌趙甬江平倭碑文亦當補入書此以俟他日增輯焉

書程忠壯公像誥傳譜卷後

新安程氏諸派俱出梁忠壯公後公勲業載南史陳書而國朝雍正間所刊公墓闕僞錄紀述尤詳公裔學圃上舍

見际公遺像及宋理宗時誥并金安節所作傳譜圖則自東晉元譚公始十二世至公案簞墩集祁門善和程氏重脩報慈菴祠宇記作元譚之後十二世孫是爲忠壯公元譚爲本郡太守據得李邕碑訂定訖二十九世序贊多兩宋巨公墨蹟余嘗謂大業之後必有賢子孫世守其澤穆叔所謂保姓受氏以守宗祊世不絕祀蓋天亦若爲之呵護者然而亦有不可必者此先古之所以重有賴於後人也揮塵前錄載台吏楊滌藏外氏元相國綸軸爲白樂天行并書有畢文簡夏文莊元章簡諸公跋識尋爲秦熺所取恨當時不能入石丹陽李格秀才系出唐大鄭王房出

其遠祖武德貞觀以來告命勅書百餘亦有薛少保顏魯公書者明清每誦親舊經由不惜一訪而閱之樂郊私語載宋樞相慎求之後郭老人出其告身像贊相示桐壽攝衣冠拜之分褻糧之餘爲贈又楊友直爲宋文公億之後因拜其高曾已下諸像乃知友直之能嗣其先德觀於二書所言而昔人之所重可知矣往余曾見笠澤東山席氏宗賢圖像自梁湘西侯威公闡文至宋述古殿大學士旦爲像凡五前後題識二十餘人詞翰皆爲世所寶又吾禾宋王定肅希尙書泊吾家隱侯圖譜俱嘗寓目至今猶往來於中也公裔徧天下且多聞人與余投契者不少他日

當轉語之俾各摹寫以廣其傳愈久不廢未審上舍以爲何如

書王右丞集後

家藏右丞集十卷文四卷余購自吳山爲無錫夫湫山人顧起經元緯校刻本詩六卷則余弟雲泉得自西埏里中蓋顧洞陽可久註說本也夫湫尚有詩箋惜未之見洞陽評註簡當其於右丞詩所得獨深余案嘉靖間劉高平刊唐文成龍筋鳳髓滁陽胡松取唐人名判數條附之內安上門應閉主者誤不下鍵載右丞對判一首文集未備則今本流傳未必卽其弟王縉所進抑搜求零落卽當日亦

不少闕遺耶

書諫迎佛骨表後

表言憲宗卽位初不許度僧尼道士及勸立寺觀今豈可恣之令盛又言百姓易惑難曉苟見天子大聖猶一心敬信豈合更惜身命焚頂燒指百十爲羣解衣散錢轉相倣效老少奔波棄其業次若不卽加禁遏更厯諸寺必有斷臂嚮身以爲供養者昌黎此言微特格時君之非引之於道且灼見後日懿宗之事佛幾與梁武相後先也嘗讀杜陽雜編咸通十二年冬上製二高座賜新安國寺一爲講座一日唱經座各高二丈研沈檀爲骨以漆塗之鍍金銀



爲龍鳳花木之形徧覆其上又置小方座前陳經案次設香盆四隅立金穎迦高三丈磴道欄檻悉具錦繡襜褕精巧奇絕卽設萬人齋勅大德僧撒首爲講論上勅脩此寺制度宏麗工人以夜繼日成之上親幸賞勞觀者如堵十四年春詔大德僧數百人於鳳翔法門寺迎佛骨百官上疏諫有言憲宗故事者上曰但生得見歿而無恨也遂以金銀爲寶利用孔雀氍毹毛飾之小者高一丈大者二丈刻香檀爲飛簾花檻瓦木階砌之類昇一刹用夫數百以珠玉爲寶帳香舁不可勝紀工巧輝煥與日爭麗又悉珊瑚瑪瑙珍珠瑟瑟綴爲幡幢計用雜珍寶不啻百斛其剪綵

爲旛爲傘約以萬隊四月八日佛骨入長安自開遠門安  
福樓夾道佛聲振地上御安福寺親自頂禮泣下沾臆卽  
召兩街供奉僧賜金帛各有差京師耆老元和迎真體者  
悉賜銀枕錦綵四方挈老扶幼來觀者無不蔬素以祈恩  
福時有軍卒斷左臂於佛前以手執之一步一禮血流灑  
地至肘行膝步齧指截髮不可算數又有僧以艾覆頂上  
謂之煉頂火發痛作卽掉其首叫呼街市少年擒之不令  
動搖而痛不可忍乃號哭臥於道上頭頂焦爛舉止倉迫  
見者皆大哂焉上迎入內道場卽設金花帳溫清牀龍鱗  
之席鳳衣之褥焚玉髓之香薦瓊膏之乳皆訶陵國所貢

也先是詔令京城及畿甸於路旁裹土爲剎或高一二丈  
迨八九尺技飾金翠約及萬數妖言香剎搖動有佛光慶  
雲現路衢又坊市豪家相率爲無遮大會通衢結綵爲樓  
殿水銀以爲池金玉以爲樹競聚僧徒廣設佛像吹螺擊  
鉦燈燭相繼令小兒玉帶金額白脚呵唱於其間恣爲嬉  
戲又結錦繡爲小車輿以載歌舞充於輦下而延壽里爲  
繁華之最是歲秋七月簡陵晏駕識者以爲物極爲妖洎  
僖宗卽位詔歸佛骨於法門其導從威儀十無其一具體  
而已然京城耆耄士女爭爲送別相謂曰六十年一度迎  
真身不知再見復在何時卽伏首於前嗚咽流涕所在香

剎詔悉鏟除近甸百無一二焉嗚呼咸通十四年上距元和十四年閱六帝不及一甲子表之彰明較著朝野當無不傳誦者而懿宗特其冥頑蹈覆轍而不悔所謂尤而效之殆有甚焉者不觀諸是編所述孰則信昌黎之言同於先知先覺者哉

案懿宗時上疏切諫者莫如李茂休蔚疏引狄仁傑姚元崇辛替否所言譏病時弊惜其文不傳不得與昌黎並烈蔚傳亦特書其事而不及雜編之詳附贊一篇有足與表相發明者畧云佛者西域一槁人耳裸頂露足以乞食自資癯辱其身屏營山樊行一概之苦本無求於人然其言

荒茫漫靡夷幻變現善推不驗無實之事以鬼神死生質  
爲一條措嗜欲棄親屬大抵與黃老相出入至漢十四葉  
書入中國蹟夫生人之情以耳目不際爲奇以物理之外  
爲畏以生而死死復生回復償報歆豔其間爲或然以賤  
近貴遠爲意鞮譯差殊不可研詰華人之譎誕者又攘莊  
周列禦寇之說佐其高層累架騰直出其表以無上不可  
加爲勝妄相夸脇而倡其風於是自天子逮庶人皆震動  
而祠奉之初宰相王縉以緣業事佐代宗於是始作內道  
場晝夜梵唄冀禳寇戎大作孟蘭肖祖宗像分供塏廟爲  
賊臣嘻笑至憲宗迎佛骨韓愈指言其弊帝怒竄愈瀕死

憲亦弗獲天年懿宗不君精爽奪迷興哀無知之場丐庇  
百解之齒以死自誓無有顧藉流淚拜伏雖事宗廟上帝  
無以進焉屈萬乘之貴自等於古胡數千載而遠以身爲  
殉嗚呼逆彥祚殫天告之矣懿不三月而殂唐德之不競  
厥有來哉悲夫

又案迎佛骨不始於憲宗德宗紀貞元六年春正月詔出  
岐州無憂王寺佛骨迎置禁中二月乙亥遣使送還本寺  
未知卽此鳳翔之骨抑別有一處耶俟考

書寇忠愍詩集後

蔡公之貶也由於被酒漏言易所謂臣不密則失身者仇

邪媒孽不且予人以可抵之噉耶詩皆五七言近體蓋亦體唐賢許渾爲詩者明括人王交山力詆公澶淵之役若有惕於英宗之北狩者腐儒紙上談兵不切時要豈知宋景德初契丹雖橫當其駐兵陽城淀狃我實深泊射死達蘭尤大挫衄萊公此時內有畢士安同心協謀一相足以決策外則魏能守梁門楊延朗守遂城二軍足以制虜虜之入寇帝自將親征者再一渡河而大事定勝算操矣其與天順之受制奸閹事勢懸殊乃欲比而同之直將拾小人孤注之譏而更無忌憚全謝山嘗著論斥之所當鈔附斯集而以本傳冠其端

書鄭溪集後

宋安陸鄭獬鄭溪集五十卷見史志及晁氏焦氏志中獬字毅夫皇祐五年進士第一通判陳州入直集賢院知制誥英宗卽位數上疏言新政出知荆南還判三班院神宗初召拜翰林學士權知開封府按問不肯用新法爲王安石所惡出知杭州徙青州甚言青苗之害引疾提舉鴻慶宮卒史稱其文章豪偉峭整議論剴切精練民事始獬以進士較試於廷舍人劉原父得獬卷欲冠多士考官或難之原父爭之曰此文似皇甫湜朝廷用文取士得一湜豈不善也獬嘗與原父書亦言韓退之時用文章雄立一世



者獨李翱皇甫湜張籍耳然翱之文尚質而少工湜之文務實而不肆張籍歌行乃勝於詩至於它文不少見計亦在歌詩下使之質而工奇而肆則退之作也獬既以原父爲知己故其詩文趨嚮不越此數語其集曾一刊於淳熙十三年郡守秦燭爲之序今大典內鈔輯各體彙爲三十卷雖不必如湜之一字三緘過自矜負要亦熙寧間一文雄也又案序稱於論綏州見其計深慮遠於論毀譽見其居寵思危辨楊繪救祖無擇則特立不詭隨今其文不盡傳

灌園集載書劉瑾

字元忠吉州人

事云瑾爲淮南轉運使獬舟過

廣陵疾作使客諷告瑾願屈一視死可不瞑瑾聞之輟食而往獬曰念妻息無歸非公孰能撫我瑾許之獬卒瑾悉橐買田宅鄖溪上以女妻獬子使奉母居焉史稱獬卒後藁殯僧屋十餘年東陽滕元發爲安州乃克葬元發後守湖郡又嘗葬德清沈叔寬嚴范文正爲志其墓者字達道官終龍圖閣學士諡章敏與獬同甲進士固應誼篤死生而元忠之存待危亡爲尤難也

書灌園集後

宋南城呂南公次儒史稱其於書無所不讀於文不肯綴緝陳言熙寧初以新經取士士方崇尚馬融王肅許慎之

業剽掠臨摹南公度不能逐時好一試禮闈不偶退築室灌園不復以進取爲意元豐中陳和叔釋以翰林學士出知建昌軍賓禮南公爲諸儒倡每謂人曰吾不以左官爲不可意而榮於獲灌園先生其爲名流傾倒若此元祐初立十科薦士中書舍人曾子開薦其讀書爲文不事俗學安貧守道志希古人堪充師表科議欲命以官未及而卒子郁編遺集三十卷紹興中建昌守宜興蔣某始鏤板以傳符行中序以爲精深浩渺自成一家又曰南城豪傑之士如李觀王无咎及南公其才皆有大過人者集中如補韓退之傳盛見賞許於曾子固謂吾鄉姑山之秀世不乏

人通考引陳氏解題曰南公欲修三國志名其齋曰袞斧  
其書未成史志是集焦氏志卷帙與解題同今大典內鈔  
出詩六卷文十四卷南公與汪秘校論文書自言於列莊  
六經百家十八代史因文見道沈酣而演繹之私心自許  
謂文學之事雖使聖人復生不得廢吾所是惟當勒成一  
家俟之百世又曰若揚馬以前與夫韓柳之作此某所謂  
文者若乃場屋詭僞劫剽穿鑿猥冗之文則某之所恥者  
必若黃河泰山峻厚高簡渾灝奔注與天地齊同而日月  
不能老之者此某之所以經心容齋五筆載南公文云士  
必不得已於言則文不可以不工蓋意有餘而文不足則

如吃人之辯訟心未始不虛理未始不直然而或屈者無助於辭而已矣觀書契以來特立之士未有不善於文者士無志於立言則已必有志焉則文何可以卑淺而爲之余讀其集要爲毅然盡心思與古人並不礙其言之涉於夸也考麻姑山有十賢堂南宋以祀郡人陳彭年李觀曾鞏曾布曾肇王无咎鄧潤甫朱京朱彥南公與焉余謂陳永年曾子宣鄧溫伯並小人之尤者不如黜去稱七賢可也

書山谷集後

吳縣謝師厚

景初

太子賓客濟之

潯

孫太常禮院希深

絳

子

慶歷六年進士性倜儻勁峭博學能文尤長於詩爲歐陽  
文忠梅宛陵王荊公所推重山谷其壻也山谷詩曰自從  
見謝公論對得濠梁然則山谷雖胚胎伐檀淵源家學而  
捫腹婦翁之舍辦香固在吳中也魏道輔秦臨漢詩話山  
谷好用南朝人語專求古人未使事又一二奇字綴葺成  
詩自以爲工其實所見之僻也故句雖新奇而氣乏渾厚  
吾嘗作詩題其篇後畧雲端求古人遺琢挾手不停方其  
拾璣羽往往失鵬鯨蓋謂是也余案宋史謂山谷得法老  
杜而不爲者臨漢所譏余未敢盡信漁隱謂其自出機杼  
別成一家清新奇巧是其所長乃定論也

書都官集後

甚矣宋史之譌與續通鑑綱目之舛也白牛居士陳令舉  
貫吾禾僑雪渚李公擇常爲郡時與東坡俱作碧瀾堂六  
客卒葬吳興車蓋山見孫覲鴻慶集韋居安梅磻詩話陳  
振孫書錄解題及文獻通考方輿勝覽至元嘉禾志兩浙  
名賢錄吳興名賢錄嘉善表賢錄而史以爲烏程人熙寧  
初以屯田員外郎宰山陰上書詆新法病民謫監星江市  
稅偕太博劉凝之洪乘雙犢往來匡廬山中窮泉石之勝  
遇赦歸秀州元豐中卒事具本集而續通鑑綱目以爲謫  
後復上書言新法實便識者笑之斯言也昧居士出處

然之大節而誣蠆橫加烏乎可夫居士之爭新法當與司  
馬文富韓歐陽大程二蘇趙清獻范忠文忠宣暨韓維鄭  
獬楊繪滕元發鄭俠劉摯劉庠孫覺劉燾呂誨呂公著吳  
充唐介鮮于侁孔文仲呂陶傅堯俞陸佃王安國輩先後  
齊名焉有自變其說作兩截人之理蓋誤於宋史復出之  
一言又從而甚之耳咸淳間吾鄉葉漁村隆進士題名序  
云冠制科者固有清風峻節一奮不顧攻新法如仇甘貧  
賤如飴蘇玉局嘗憒憒憫惜之然遞芳流沃千載下凜有  
生氣此特爲居士言之也元至正己丑金華黃文獻潛白  
牛鎮戴氏義塾記云公以直道自信無所回撓每跨犢往



來山中自號白牛居士人遂以名其故里諸生息斯游斯  
仰企前修儀型未遠誠有感慕而興起安知無如公者出  
於其間蓋居士居吾秀白牛邨

見本集海惠院經藏記

其自號所由

來也余嘗考其祠墓在嘉湖二郡湖曰蘇灣曰芝亭嘉曰  
福源菴曰三賢堂曰表賢祠及思賢書院郡城舊有六一  
坊或曰取六客之一以表之鴛湖水中陸宣公祠以居士  
及趙忠定配祀崇寧三年居士孫拾宅基爲漏澤寺在嘉  
善有光德菴卽祠址俗稱荒墩爲居士首邱處或與配婁  
不同域耶而其隱居遺蹟有奉賢鄉清風涇白牛塘並在  
今武水東若明宋雷西吳里語云云最爲失考集三十卷

居士壻周開祖別所輯曾孫杞曾刊於四明久佚不傳乾

隆辛丑冬余從大典鈔得僅十四卷因取一時贈答哀輓

諸篇并後人懷古之作悉附焉其騎牛圖碑尚在金華試

院庚戌冬屬崔曼亭太守搨歸未知其為龍眠筆否也又

考居士同時因詆新法去官者知亳州新喻劉攽父攽見

傳知長葛縣荆南樂京知湖陽縣渤海劉蒙子明號正

思先知陳畱縣奉符姜潛至之見石徂知新會縣尤溪周

謂希聖見谿山餘話

書騎牛圖後

吾鄉白牛居士騎牛圖碑在金華試院庚戌秋永濟崔曼

亭先生攝守婺郡余寓書乞得二幅石已漫漶與本集叅

校復是正數字據輿地碑目書錄解題晁氏讀書志南康

舊志居士與劉凝之漢嘗以六十日盡南北廬山之勝爲

俯視圖有記五卷宋史誤作二卷碑刻詩什畢載渙與李常並爲

序而李伯時畫爲圖此圖想卽龍眠筆獨流轉於婺無從

考知其山劉敘云吳順義中史虛白自北海避地於星子

嘗乘牛山水間民間尚存史先生騎牛圖案虛白字畏名

見陸游馬令南唐書及鄭文寶南唐記事吳任臣十國春

秋烈祖輔吳曾官州從事謝病去南游至九江落星灣因

家焉嘗乘雙犢板轅挂酒壺車上山童總角負一琴一瓢

以從釣磯立談一卷乃虛白子所作宋天聖中賜號沖靖  
先生又案東都事畧凝之筠州人卽劉道原恕父爲潁上  
令以剛直不屈棄官歸家廬山之陽同年歐陽修高其節  
作廬山高以美之司馬溫公王荊公並有和作又山谷拜  
凝之畫像詩棄官清潁尾買田落星灣身在菰蒲中名滿  
天地間誰能四十年保此清淨退往來澗谷中神光射牛  
背陸放翁跋騎牛圖云公卿貴人方黃金絡馬傳呼火城  
中時欲如二公騎牛山谷蕭散遺物固不可得若予者仕  
旣齟齬及斥歸欲買一黃犢代步其費二萬有畸作欄畜  
童又在此外遂一笑而止乃知二公風流亦未易追也又

送陳吏部詩勉哉蚤了功名債要畫騎牛第二圖註云先  
賢良與劉凝之有廬山騎牛圖又陳敬初亦有宋劉凝之  
騎牛圖詩昔淳熙己亥朱子守南康曾脩劉公之墓爲作  
壯節亭記謂其高懷勁節可以激懦律貪立祠祀之紹熙  
十年章貢曾致虛來守復求朱子爲纂墓記予謂是三先  
生者合祠鹿洞舊矣後之守土者尊德樂道皆有同心能  
無意爲之脩舉乎

書東堂集後

滂爲人無足取東坡嘗與書云今時爲文者至多可喜者  
亦衆然求如足下閒暇自得清美可口者實少也及在嶺

南又與尺牘云得書累幅又獲新詩一篇居夷久矣不意復聞韶濩之餘音又云秋興之作追配騷人矣不肖何足以窺其粗過不過自有定數然非厄窮無聊何以發此奇思以自表於世耶其推服如此所云秋興之作殆卽集中擬賦一篇也高郵陳造題其集云韻語精深婉雅視秦黃晁張蓋不多媿又云板藏嘉禾郡庫蓋佚已久矣余旣鈔自大典爲補響應山禱雨五古一首附以坡詩銅山寺七絕一首並附後人詩記以資叅考又補入驀山溪詞序一篇月波樓記寒穴銘各一首并毛刊六十家詞而別爲附錄一卷共十三卷仍符陳氏解題之數云

書斜川集後

曩余輯斜川事迹爲小坡外紀一書味辛同年刊此集時  
曾假余書今附錄二卷大半是也洎讀味水軒日記載有  
題郭熙平遠六言三絕句木落沙明秋浦雲收烟澹瀟湘  
曾學扁舟范蠡五湖深處鳴榔望斷水雲千里橫空一抹  
晴嵐不見邯鄲歸路夢中畧到江南諸子只應見畫此中  
我獨知津寫到水窮天杪定非塵土間人又東坡食蠓帖  
極言蠓之美令叔黨勿宣傳北方君子恐求謫海南以分  
其味而文祝諸跋直以其詩字俱有家法足以亂真且有  
吳性中從項氏探此驪珠宜遂摹傳海內之言所當鈔補

集中者也又宋景濂有跋叔黨書山谷慈氏閣詩後一篇  
皆須附入益以知書難徧觀紋梓正無須亟亟耳

書尹肅公集後

和靖尹先生文集十卷明嘉靖九年莆田洪西淙珠宦越  
時所刊白鹿山人蔡宗究作序余鈔自錢文端家九卷已  
下並附錄也曩余嗜讀伊洛之書蒐纂陸遺增有二卷因  
改署尹肅公集以次於純公正公之後蓋自丁亥迄今三  
十年矣越板不可得見顧安得爲程氏學者并先生言行  
錄重與校刊行世識此以俟其人

書浮沚集後



宋永嘉周行已恭叔浮沚集行己元祐六年進士爲太學博士以親老歸教授其鄉發明中庸之旨再入爲館職出宰樂清永嘉學問所從出也陳振孫自言祖妣爲行己女故知其本末所居謝池坊有浮沚書院集十六卷後集三卷張約齋仕學規範引據書內有永嘉文集卽是書兩浙名賢錄祖豫父泳皆中第行己風儀秀整語音如鐘讀書十行俱下入太學作齋揖文同舍遵行之豐司業稷騶從闕敦化堂下行己移書規切之稷媿謝時新學行獨之伊洛從程伊川二劉許趙皆敬下之作顏子不貳過論有曰過不必大毫末萌於心而天地爲之應悟不必久斯須著

於心而天下歸其仁伊川可之行已早達京師貴人爭欲妻之行已曰吾姨母貧其女贅吾母雖不言意已有屬養志可也辭昏歸娶之伊川語人曰某年未三十亦做不得此事宜和初除秘書省正字鄆守王靚請爲幕賓及卒靚以朝命津其喪歸葬安固有文集三十卷唐守文若繪像祠於學宮嘉靖浙江通志行已與同縣蔣元中等八人皆見道超卓爲四方學者矜式稱元豐太學九先生其族孫去非爲張南軒高弟案史志周博士文集十卷注不知名又載周行已集十九卷宋史複舛往往若此然云十九卷則與陳合焦氏志亦同今大典內纂出八卷集中上韓守

書云生五十一年秩未離乎九品仕二十七載官僅書乎  
四考宰相書云少慕存心養性之說於周孔佛老無所不  
求而未嘗有意於進取祭酒書云十五學屬文十七補太  
學諸生學科舉文又二年讀書益見古人文章學爲古文  
又二年讀書益見道理於是學古人之修德立行惜其論  
不存卽陳氏所訾林越序亦佚余讀吳叔永鶴林集有云  
建安朱氏之學接於周公行己許公景衡實本伊川而韓  
仲止流澗泉日記則云恭叔文字溫淡但時有莊老與程  
氏之說相背詩亦好

書洪龜父集後

宋南昌洪朋清非集陳氏解題作清虛朋乃石州司法叅  
軍師民子母爲山谷女弟與弟芻駒父炎玉父羽鴻父俱  
有才名號四洪豫章續志稱其早失怙恃受業祖母文城  
君李氏天資嗜學尤長於詩舅氏山谷嘗曰龜父筆力扛  
鼎他日不患無文章垂世須要盡心於克己不見人物臧  
否全用其輝光以照本心力學有暇更精讀千卷書乃能  
畢茲事蓋所以期待之者如此兩貢禮部不第年僅三十  
八同郡黃君著裒其詩百篇山谷在宜州以書來弔且曰  
黃君所編篇篇可傳也呂本中作江西詩社宗派圖以朋  
居陳師道潘大臨謝逸之次紫微詩話盛推其寫韻軒詩

其集久無刊本馬氏考焦氏志僅載其名今大典內鈔出析爲二卷並取江湖集及宋詩紀事諸本補闕訂訛稍還其舊嘗考王直方詩話龜父詩云琅玕嚴佛界山谷改云琅璫鳴佛屋又有一朝厭蝸角萬里騎鵬背一聯最爲妙絕山谷亦嘗歎賞劉後村詩話龜父警句往往前人所未道其與駒父遊梅仙觀詩云願爲龍鱗嬰勿學蟬骨蛻是以直節期乃弟矣今惟琅璫句見宋文鑑

書蒙隱集後

宋青田陳棣字鄂父浙東安撫使汝錫字師子子汝錫以詩句見賞於山谷卽所傳閒愁莫浪遣畱爲痛飲資是也

紹聖四年進士邑之登第自汝錫始崇寧間提舉福建學  
事有鶴溪集十二卷刊行棣以父任終通判潭州所撰蒙  
隱集曾刊於宜春流傳絕少今大典內鈔出古今體詩各  
一卷宋自熙寧後括人如葉濤鮑慎由輩皆知從半山東  
坡學爲文章而括之詩派亦駸駸邇上各自成家要得蘇  
黃門徑棣起家任子作掾膠西詩亦綽有父風琅琅可誦  
採括州之秀正如申椒菌桂在所不遺也

書宗忠簡公集後

宋宗忠簡公爲吾浙義烏人而祠

壽邱山

墓

馬鞍山

乃在京峴

余南北渡江往來於潤者屢矣未及一憑弔也集六卷附

錄二卷編自樓昉近會稽王延曾重編考公之歿塋左承

議郎知婺州金華余顥作狀而顯謨閣學士曾懋作墓銘

見遺事聚樂齋集文中又嘉定間宛陵吳柔勝作公行實

十卷見湖郡志惜不得與元黃文獻讀遺事詩及祠記

柳待制賈題朱昉帖明宋文憲題詒詩蘇平仲伯復官

誥跋斯文僖貴祠堂碑俱附斯集

公薨於汴數日將士去者十五汴人以公子穎嘗居戎幕

得士卒心相率言於朝請繼父任時已除杜充畱守乃以

穎直秘閣為其判官尋與充議不合去秦檜枋國坐貽李

泰發書降三官檜死為兵部郎申終其官厥後著於婺者

七世孫滿心寺僧曰謚購田祠公亦可謂浮屠之賢者矣  
十一世孫濟才宣德正統中先後居喪廬墓郡守石表奏  
於朝擢知四川之瀘州吾鄉呂文懿送宗太守赴官序畧  
云忠簡篤於忠濟才篤於孝是也其見於他郡者明王止  
仲行半軒集載宗處士墓志銘處士虞伯生弟子爲公九  
世孫五世祖朝奉郎通判秦州諱如圭者徙潤守瑩因占  
籍焉曾祖諱有天知光山縣人元有句容尉諱夔平江路  
錄事司典史諱昌者其祖父也處士侍父宦吳遂從吳籍  
卒葬於吳又禾中亦有公裔見文懿送宗先生睢州學正  
詩首云構李宗著姓忠簡家慶涵當時徙自婺世緒殊不



凡聞孫曰景昭偉秀同髯叅案檣李英華教授宗昇字景昭號介菴卽其人也又世宗時給諫宏暹宦江右籍分宜相著名見因樹屋書影

書湖山集後

宋龍圖閣直學士謚康簡仙居吳芾湖山集芾字明可紹興二年進士史稱芾與秦檜有舊檜專政坐不附檜論罷薦授御史力詆和議累遷刑吏禮三部侍郎前後倖處婺越及知臨安太平隆興六郡並治因其俗嘗曰視官物當如已物視公事當如私事與其得罪於百姓寧得罪於上官立朝不偶晚退閒者十有四年自號湖山居士爲文豪

健俊整有表奏五卷詩文三十卷周益公序稱歷吏戶禮  
刑少常伯給事中又嘗典治內史五爲帥守享林下之樂  
者十有六年次子洪守嘉興袁公遺文號湖山集二十五  
卷長短句三卷別集一卷奏議八卷與本傳小異又稱乾  
道庚寅芾帥豫章胡忠簡銓以臬守必大以閫憲俱入奏  
事過從燕集各爲二詞以送今其詞不盡傳又稱紹興甲  
子芾以秘書省正字輪對奏江浙平米價一事必大得之  
日厯勅局編類紹興寬卹詔令載之而不知其出於芾洵  
足補本傳闕遺之大者又案趙希弁讀書附志湖山集四  
十三卷和陶詩三卷附錄三卷與史志同史別有當塗小

集八卷湖山遺老傳一卷焦氏志作湖山集四十卷與序不合序當得其實今大典內鈔出冠以和陶詩二卷文二首綴於後共十卷益公所謂意遠而詞達身簪紱而心邱壑者數語盡之又案樓攻媿集載朝請大夫吳津并姚碩人墓志銘津字仲登曾祖允昭祖師錫考芾居邑之石井津稱興化使君有詩文十五卷則康肅長子也

書鴻慶集後

宋晉陵孫覲鴻慶居士集曩在京師閱吾鄉蔣石林藏書僅十四卷且多闕文最後覲德清徐氏所鈔四十二卷足本第無外集耳周益公序謂筆勢翩翩高出流輩又謂其

章疏制詔表奏往往如陸敬輿明辨駿發樓攻媿跋傳和  
州友諒之誌目爲一代文章伯而岳亦齎程史譏其諛墓爲  
多如武功大夫李公一璫耳亟稱其高風絕識自以不獲  
見之爲大恨言必稱公殊不忤於宋用臣之論諡也銘曰  
靖共一德厯踐四朝如砥柱立不震不搖亦太侈云又云  
在政府時有某作行狀言者摘其事以爲士大夫之不忍  
爲而以覲不及於議爲幸余考高宗本紀覲於張邦昌僭  
逆時與王時雍吳玠莫儔李擢俱受僞命建炎初歸州安  
置次年復坐前知臨安府贓汙貸死除名象州羈管放翁  
筆記亦云孫仲益至紹興末復左朝奉郎乃署銜集中行

秦檜左司諫制序呂惠卿集已極掄揚雖自言忤京檜爲

李莊簡

光

疏論投荒顧其與史相書附會和議兩致書於

萬俟卨歿銘其墓有云權門氣燄可鑠金石公如砥柱屹  
立於危波急湫中不可移奪此蓋指卨使金還不能受檜  
鉗制以致罷謫而言夫卨之無恥始附繼叛不過稍爲異  
同以離其迹耳一旦當國罪與檜同彼趙師彛持異論於  
侂冑亦何獨不然又韓蘄王墓志云岳飛范瓊輩皆以跋  
扈賜死以鄂王之忠至與叛將並列此尤顛倒是非之甚  
者宜章文肅頴之斥爲傾邪朱文公舉王允之論言佞臣  
不可使執筆也觀又有內簡尺牘編註十卷蓋其門人李

祖堯編并註其文與集多異同

書香山集後

宋義烏喻良能字叔奇與兄良倚弟良材良弼並名於時  
元黃文獻先世墓銘後記喻葆光娶於黃子男五人其四  
人俱以文章知名是也良能與良倚同登紹興丁丑壬子  
朋榜進士良材良弼並國學進士陳龍川稱烏傷四君子  
則良能良弼及何恪茂恭陳炳德先也良能由廣德尉累  
遷國子監主簿進忠義傳二十卷起戰國王蠲終五代孫  
晟通百九十八人乞頒武學授之將帥孝宗嘉其質實平正  
御書其名於屏間丁內艱服除以國子博士召兼工部郎

中除太常丞兼舊職請外知處州尋奉祠歸以朝請大夫  
義烏縣開國男食邑三百戶致仕營家圃曰磬湖日以觴  
詠自娛終焉鄉人慕之表其地曰郎官里所著尚有諸經  
講義五卷家帚編十五卷良倚字伯壽著有唐論四卷策  
斷二卷文選補一卷及詩文十卷良弼字季直有杉堂集  
十卷樂府五卷龍川嘗稱叔奇爲文精深簡雅讀之愈久  
而意若新季直文蔚茂馳騁蓋將包羅衆體而一字不苟  
讀之亹亹無厭也叔奇尤工於詩洪景盧楊誠齋皆與爲  
文字友考金華先民傳及縣志香山集三十四卷焦氏志  
作十七卷今大典內採出賦辭古今體詩析爲十六卷

書安陽集及遺事別錄家傳後

韓氏渡江時登仕籍者尚八九十人散處諸郡而越族爲特盛蓋始公會孫左司郎中諱膺胄扈蹕而南徙居越之五雲里有五雲次舊聞膺曾孫大理寺主簿詢齋先生諱翼甫有五雲續舊聞翼甫子莊節先生性傳程朱之學者有五雲漫稿十二卷與所著禮記說書辨疑詩釋音並行於世是爲公八世孫公十世孫謬扁其藏書之室曰五雲書舍而自號五色生昭不忘其祖元義烏黃文獻晉曾傳其事天台劉德元仁本作五雲詩四言五章美之乾隆甲寅冬余重遊大梁遇藩幕韓濟乃越人而客於豫者其先



固相人也猶能爲余言之

書九華集後

宋著作郎兼國史院編修實錄院檢討蜀仁壽員興宗字顯道未第時著書九華山自號九華子晚始策名薦除教授召試入三館預修四朝正史孝宗乾道間抗疏論劾言利之臣中譏奉祠去僑居澗州以卒寶慶三年孫榮祖出其全集弟夢協有跋并刊李微之心傳序云公在館學時國有大議凡臺官諫垣所不敢言者公獨言之歸附旣畱而垂遣瞽御因逐而旋召均輸久廢而驟復此三者皆上意所深嚮朝廷所必行而公上不負明主下不附所好矢筆

盡言囊封亟上雖斥逐致死而不悔也又云員公之文高古簡嚴惟陳言之務去極其所就必欲至杜韓而後止而趙忠定汝愚祭文亦云念正論之特起自歐陽公而下無斯人歎先見之甚高恨蘇明允之死不復作其爲名流稱許如此集五十卷見焦氏志今大典內鈔出詩文二十五卷附錄一卷并所著論語老子解畧西陲筆畧紹興采石戰勝錄各一卷興宗爲朱陸同時人集中有答陸梭山張南軒書集外所行辨言一卷斷詩序爲非古與考亭合又洪文惠撰隸釋時咨以漢碑數事集載答書具徵博雅其論語解如從心作縱心攻乎異端主辭而闢之可參註疏其

老子解自謂游神孔老之門含英漱神二十餘年所得也

筆記二種一記金人犯邊諸事一記虞雍公

允文

督諸將敗

海陵于采石戰功始末雍公乃其鄉達簡尺常通詩有悲  
兩淮一篇合之此記均有足補史家之漏畧者又案員爲  
半千後其先出彭城劉氏唐末員虔嵩刺簡州殉國子孫  
自旁郡移家陵州入宋任城令名延者嚴事陳希夷受其  
方書興宗曾祖行名安興字文饒者與蘇老泉張少愚  
爲友文湖州稱之曰文饒樂府苗裔騷人抗衡張籍稱文  
質先生

頤綵堂文集卷九終